



Republika e Kosovës – Republika Kosova
Paneli Zgjedhor për Ankesa dhe Parashtresa
Izborni Panel za Žalbe i Predstavke

Anr.1135/2021

Paneli Zgjedhor për Ankesa dhe Parashtresa (PZAP), në panelin e përbërë nga gjyqtarët: Ferki Xhaferi kryesues, Milena Đerić dhe Adnan Konushevci anëtarë, duke vendosur përkitazi me ankesën e Subjektit Politik Lidhja Demokratike e Kosovës (LDK), me seli në Prishtinë, paraqitur kundër Subjektit Politik Lëvizja Vetëvendosje (LVV), me seli në Prishtinë, për shkak të thyerjes së heshtjes zgjedhore - bërja e fushatës përmes rrjetit social Facebook, për Raundin e Dytë të Zgjedhjeve Lokale, të mbajtura me datë 14.11.2021, në seancën e panelit të mbajtur me 15.11.2021, mori këtë:

V E N D I M

I. PRANOHET e bazuar ankesa Anr.1135/2021 e datës 14.11.2021, e paraqitur nga Lidhja Demokratike e Kosovës (LDK), me seli në Prishtinë, paraqitur ndaj Subjektit Politik Lëvizja Vetëvendosje (LVV), me seli në Prishtinë, i shqiptohet dënim me gjobë në lartësi prej 300.00 (treqind), për shkak të shkeljes së Kodit të Mirësjelljes për Subjektet Politike, Mbështetësit e tyre dhe Kandidatët, me rastin e thyerjes së heshtjes zgjedhore përmes rrjeteve sociale, për Raundin e Dytë të Zgjedhjeve Lokale të datës 14.11.2021.

II. DETYROHET Subjekti Politik Lëvizja Vetëvendosje (LVV), me seli në Prishtinë, që gjobën e shqiptuar si në pikën -I- të dispozitivit të këtij vendimi ta paguaj në afat prej 15 (pesëmbëdhjetë) ditëve, nga dita e pranimit të këtij vendimi nën kërcënim të dënimit shtesë.

A r s y e t i m

PZAP-i, ka pranuar më datë 14.11.2021 ankesën Anr.1135/2021 nga subjekti politik Lidhja Demokratike e Kosovës (LDK), e parashtruar kundër Subjektit Politik Lëvizja Vetëvendosje (LVV), në të cilën pretendohet se më datë 14 Nëntor 2021, rreth orës 15:00 kanë vërejtur se mbështetësja e Subjektit Politik LVV, Venera Lllunji, ka thyer heshtjen zgjedhore në rrjetin social Facebook.

Më tej parashtruesi i ankesës ka theksuar se statusi i postuar në rrjetin social Facebook përmbante shkrimin “*Dil e voto!, Voto mençur, për zhvillim dhe dinjitet !VOTO Lëvizjen vetëvendosje Voto voto 144VOTO me Arben Vitić*” e të cilin ka bërë thirrje për votim.

Sipas parashtruesit të ankesës këto veprime janë në kundërshtim me nenin 36 pika 1 të Ligjit për Zgjedhjet e Përgjithshme-LZP dhe ka kërkuar nga PZAP-i, që Subjekti Politik LVV, të sanksionohet sipas legjislacionit në fuqi.

Paraqitësi i ankesës, si dëshmi për pretendimet e tij, ankesës ka bashkangjitur një fotografi të printuara nga rrjeti social-Facebook.

PZAP, më datë 14.11.2021 i ka paraqitur Subjektit Politik LVV, me seli në Prishtinë, kërkesë për përgjigje lidhur me ankesën Anr.1135/2021 me të cilën ka kërkuar që të përgjigjet deri më datë 15.11.2021 në ora 10:00. Në përgjigjet në ankesë të datës 14.11.2021, nga Subjekti Politik LVV, theksohet se pretendimet e ankuesit janë të paqëndrueshme për faktin se fotografitë e bashkangjitura si provë nuk është specifikuar data dhe dita e postimit. Pra në asnjë mënyrë nuk janë të vërteta pretendimet e ankuesit se është shpërndarë postimi gjatë heshtjes zgjedhore.

PZAP-i, pas shqyrtimit paraprak të bazueshmërisë së ankesës dhe vlerësimit të pretendimeve ankimore, provave materiale – fotografive, që gjenden në shkresat e lëndës, në kuptim të nenit 117 paragrafi 2 dhe 3 të LZP-së, gjeti se:

Ankesa është e bazuar

Paneli, pas shqyrtimi të shkresave të lëndës ka konstatuar se Subjekti Politik LVV, me seli në Prishtinë, gjatë heshtjes zgjedhore në rrjetin social “Facebook”, kanë bërë fushatë zgjedhore, veprim ky që është në kundërshtim me nenin 36.1 pika b) e LZP-së, e cila përcakton *“Njëzet e katër (24) orë para hapjes së Qendrës të Votimit për hedhjen e votës, e deri në mbylljen e tyre, subjekteve politike, mbështetësve ose kandidatëve të tyre u ndalohe bërja e fushatës në çfarëdo mënyre”*.

Paneli, konform nenit 8 par. 5 të Rregullave dhe Procedurave të PZAP-it, Nr. 02/2015, me datë 14.11.2021, ndërmori hetim lidhur me pretendimet e paraqitësit të ankesës dhe gjeti se të njëjtat janë të bazuara, sepse postimi i kontestuar si në ankesë ishte ende aktiv dhe ka qenë ende prezent në faqen e përdoruesit për reklamim.

Në raport me pretendimet e Subjektit Politik LVV, lidhur me faktin se fotografitë e bashkangjitura si provë nuk është specifikuar data dhe dita e postimit, Paneli i vlerësoi si të pabazuara ngase nga dëshmitë e bashkangjitura në ankesë shihet qartë se postimi ka ndodhur në ditën e votimit më datë 14.11.2021 në ora 12:37, veprim i cili ndalohe me dispozita ligjore, ku theksohet se subjekteve politike apo kandidatëve të tyre iu ndalohe të bëjnë fushatë, në një mënyrë apo tjetër 24 orë para hapjes së Qendrave të Votimit dhe gjatë ditës së votimit për hedhjen e votës e deri në mbylljen e tyre, dhe se postimi i bërë ka qenë ende aktiv postimi është vërtetuar pas verifikimeve të bëra nga PZAP, andaj si e tillë konsiderohet se është bërë shkelje e heshtjes zgjedhore në ditën e votimit prandaj edhe se ankesa e Subjektit Politik LDK, është e bazuar.

Paneli, vendimin e tij e mbështet në dëshmi të qarta dhe bindëse, konform nenit 117 par.3 të LZP-së, andaj nuk i mori parasysh pretendimet e paraqitësit të përgjigjes në ankesë, pasi që nga ana e tyre nuk u ofrua ndonjë dëshmi e cila argumenton pretendimet e tyre.

Paneli, me rastin e shqiptimit të gjobës si në dispozitiv të këtij vendimi, u mbështet në dispozitat e lart cituara, e në veçanti duke marr parasysh rrethanat e rastit siç janë natyra e shkeljes dhe ndikimit të mundshëm të saj, në procesin zgjedhor, shkallën dhe peshën e shkeljes, gjithashtu si rrethanë paneli mori faktin se subjekti politik të cilit i është shqiptuar gjoba LVV, ka marrë pjesë në zgjedhjet e mëparshme dhe ka marrë mjete financiare nga Buxheti i Republikës së Kosovës për zhvillimin e aktiviteteve të lidhura më fushatën zgjedhore dhe faktin se subjekti politik në fjalë ka bërë përpjekje që ti njoftoj mbështetësit e saj lidhur me respektimin e legjislacionit në fuqi me qëllim të evitimit të shkeljeve gjatë

heshajes zgjedhore në ditën e votimit, e të cilat rrethana do të ndikonin në lehtësimin e gjobës së shqiptuar si në dispozitiv të këtij vendimi.

Paneli, vlerëson se gjoba e shqiptuar si masë, përveç aspektit të dënimit në raport me subjektin që nuk e ka respektuar Kodin e Mirësjelljes, shërben edhe si masë preventive që në të ardhmen subjektet politike të përmbahen nga veprimet e tilla që bien ndesh me rregullativën ligjore, që cenojnë të drejtën apo lirinë e votimit, në mënyrë që të sigurohet klimë e qetë dhe e përshtatshme për votim të lirë dhe të pa ndikuar si bazament i një procesi demokratik zgjedhor.

Nëse subjekti të cilit i është shqiptuar dënimi, nuk e paguan të njëjtin brenda afatit të përcaktuar në dispozitiv të tij, atëherë në pajtim me nenin 120.2 të LZP-së, subjektit do të shqiptohet dënim shtesë. Ky paralajmërim për dënim shtesë është përcaktuar me nenin 120.2 të LZP, i cili përcakton: “ *Dështimi për të paguar dënimin apo për t’ju bindur një urdhërese të PZAP-it, brenda periudhës kohore të saktësuar në vendimin e PZAP-it, është një shkelje tjetër e këtij ligji që mund të sanksionohet me dënim shtesë nga PZAP-i.*”, ashtu siç është vendosur në pikën II të dispozitivit të këtij vendimi.

Paneli mbi bazën e të dhënave të lartcekura në mbështetje të nenit 120.1 pika c) dhe nenit 118.1 të LZP-së, vendosi si në dispozitiv të këtij vendimi.

Paneli Zgjedhor për Ankesa dhe Parashtresa

Anr.1135/2021 më datë 15.11.2021

Kryesues i Panelit
Ferit Xhaferi



Këshillë Juridike: Kundër këtij vendimi nuk është e lejuar ankesa.